

Visoki predstavnik poduzeo mjere kako bi osigurao neometano funkcioniranje SIPA-e

Na zahtjev premijera Bosne i Hercegovine gospodina Adnana Terzića, visoki predstavnik u BiH Paddy Ashdown danas je imenovao Sredoja Novića na funkciju direktora Državne agencije za istrage i zaštitu (SIPA). Visoki predstavnik ovu je odluku donio nakon sedam mjeseci čekanja i neizvjesnosti u pogledu ovog imenovanja.

Imenovanjem gospodina Novića visoki predstavnik je podržao evropski princip o uklanjanju politike iz rada policije postavljajući kandidata kojeg je i Komisija za izbor Vijeća ministara BiH ocijenila kao najbolje kvalifikovanog. Gospodin Nović dobio je najveću ocjenu u procesu javnog konkursa koji je provela Komisija za izbor Vijeća ministara u skladu sa Zakonom o ministarskim, vladinim i drugim imenovanjima.

Vijeće ministara u toku proteklog mjeseca nije uspjelo donijeti konačnu odluku o tome kojeg će kandidata imenovati na pomenutu funkciju. Ova kontinuirana praznina na najvišem nivou u Agenciji prijetila je da ugrozi rad SIPA-e u njenoj ključnoj borbi protiv organiziranog kriminala, nezakonite migracije, međunarodnog terorizma, pranja novca, teških privrednih zločina, te da ugrozi njene napore u pogledu hapšenja optuženih ratnih zločinaca.

Funkcionalna Državna agencija za istrage i zaštitu također je jedan od ključnih uslova iz Studije izvodljivosti. Sa gospodinom Novićem na funkciji vršioca dužnosti direktora, Agencija je napravila značajan napredak na putu da postane vodeća institucija za provedbu zakona u BiH; broj zaposlenih

porastao je na ukupno 435 zaposlenih, a dodatnih 300 članova osoblja je izabrano i čekaju postavljenje od strane direktora; svi odjeli Agencije u potpunosti su operativni; za samo četiri mjeseca Finansijsko-obavještajni odjel blokirao je više od 1,3 miliona KM nezakonitih sredstava koja se odnose na organizirani kriminal. SIPA trenutno istražuje 30 slučajeva organiziranog i teškog finansijskog kriminala.

Imenovanje gospodina Novića na funkciju direktora SIPA-e stupa na snagu odmah. Zakonom o policijskim sužbenicima BiH predviđen je četverogodišnji mandat za direktora SIPA-e. Kratkoročni mandat vršioca dužnosti direktora SIPA-e okončan je 24. aprila 2005. godine.